



U susret ramazanu (Meka)

Hatib: dr. Mahir ibn Hamed el-Muajkili

25. šaban 1447. po Hidžri / 13. februar 2026.

Hvala Allahu, Koji je post učinio štitom i putem koji vodi ka Džennetu. Njemu, Uzvišenom, zahvaljujem i Njemu se kajem i od Njega oprost tražim; On je Svoje robove uputio na najbolji put i najispravniji način života. Svjedočim da nema boga osim Allaha, Jedinog, Koji nema sudruga, svjedočenjem kojim se nadam Njegovom zadovoljstvu i Džennetu, i svjedočim da je naš prvak i vjerovjesnik Muhammed, sallallahu alejhi ve sellem, Allahov rob i poslanik, koga je On poslao iz Svoje dobrote i milosti. Neka su Allahova milost, blagoslov i spas na njega, na njegovu porodicu, ashabe, tabiine i sve koji ih slijede u dobru i koji koračaju putem Knjige i sunneta.

O skupino vjernika, oporučujem sebi i vama bogobožnost, jer je bogobožnost put spasa i sigurnosti, i put uspjeha i časti. Uzvišeni kaže: "O vjernici, ako se budete Allaha bojali, On će vam sposobnost darovati pa ćete istinu od neistine moći rastaviti i preko ružnih postupaka vaših će prijeći i oprostiti vam. A Allahova dobrota je neizmjerena." (El-Enfal, 29)

Ummete islama, Allahova savršena mudrost očituje se u tome što je među Svojim stvorenjima dao razlike u vrijednosti i položaju. Stvorio je noći i dane, mjesece i godine, pa je neke od njih posebno odlikovao i učinio vremenima u kojima se djela višestruko nagrađuju.

Pred nama je blagoslovljeni mjesec u kojem je Allah objavio Svoju Knjigu, propisao nam post i učinio najvećim ciljem posta postizanje bogobožnosti: "O vjernici! Propisuje vam se post, kao što je propisan onima prije vas, da biste se grijeha klonili (da biste bogobožni bili)" (El-Bekara, 183).

To znači da budete bogobožni u svojim ibadetima, u odnosima s drugim ljudima, u svom moralu, u brizi o sebi, svojoj porodici i djeci i da između sebe i Allahove





kazne postavite zaštitu izvršavanjem Njegovih naredbi i ostavljanjem zabrana. Bogobojaznost znači da se pokoravaš Allahu, s jasnim dokazom, nadajući se Njegovoj milosti, i da ostavljaš grijeh, s jasnim dokazom, strahujući od Njegove kazne. Bogobojaznost je najbolja opskrba: "I onim, što vam je potrebno za put, snabdijte se. A najbolja opskrba je bogobojaznost" (El-Bekara, 197).

Bogobojaznost je Allahova oporuka prvim i potonjim generacijama: "Mi smo onima kojima je data Knjiga prije vas, a i vama, već zapovjedili da se bojite Allaha" (En-Nisa, 131).

Prihvatanje djela kod Allaha vezano je za bogobojaznost: "Allah prima samo od onih koji su dobri (bogobojazni)" (El-Maida, 27).

A bogobojazni su pobjednici na Sudnjem danu: "Dat ćemo da takav Džennet naslijedi onaj od robova Naših koji se bude grijeha klonio (bude bogobojazan)" (Merjem, 63).

Poštovani vjernici, među značenjima i vrijednostima posta jeste i to da se njime postiže iskrenost prema Allahu, kao i strpljivost (sabar), a strpljivi će biti nagrađeni bez računa. Kad postač ostavi hranu, piće i strasti radi Allaha, Allah mu to nadoknadi boljim od toga. Kolika je nagrada za post, to zna samo Plemeniti, Uzvišeni. Poslanik, sallallahu alejhi ve sellem, rekao je: "Svako djelo sina Ademovog se umnogostručuje: dobro djelo nagrađuje se deseterostruko, pa i do sedam stotina puta, pa i više, koliko Allah hoće. Uzvišeni Allah kaže: 'Osim posta; on je Moj i Ja za njega posebno nagrađujem. Postač ostavlja svoju strast i hranu radi Mene.'" (Ahmed)

Uzvišeni je postačima pripremio posebna vrata u Džennetu kroz koja neće ući niko osim njih.

"Postač ima dvije radosti: radost prilikom iftara i radost kada sretne svoga Gospodara."

"Reci: 'Neka se zato Allahovoj blagodati i milosti raduju, to je bolje od onoga što gomilaju.'" (Junus, 58)





O vjernici, mjesec ramazan je veličanstvena sezona preispitivanja (samoobračuna) i široko polje nadmetanja u dobru. U njemu su muslimani jednaki: svi poste radi svog Gospodara, traže oprost za svoje grijehе, počinju post u isto vrijeme i u isto vrijeme iftare, kako bi se ostvarile riječi Jednog Jedinog: "Ova vaša vjera – jedina je prava vjera, a Ja sam Gospodar vaš, pa Me se pričuvajte!" (El-Mu'minun, 52).

Plemeniti Kur'an objavljen je u ovom časnom mjesecu. Poslanik, sallallahu alejhi ve sellem, svake noći u ramazanu učio je Kur'an pred Džibrilom. Ibn Abbas, radijallahu anhumа, rekao je: "Allahov Poslanik, sallallahu alejhi ve sellem, bio je najdarežljiviji čovjek, а najdarežljiviji je bio u ramazanu, kada bi mu dolazio Džibril. Dolazio bi mu svake noći u ramazanu i podučavao ga Kur'anu. Allahov Poslanik bio je darežljiviji u dobru od blagorodnog vjetra." (Buhari i Muslim) Zato je za muslimane važno da što više uče i razmišljaju o Kur'anu.

Ramazan je mjesec posta, namaza, Kur'ana, dobročinstva, darežljivosti i milosti. U njemu se podsjećamo na stanje slabih i siromašnih.

U njemu Allahov glasnik poziva: "O ti koji želiš dobro, pristupi, а ti koji želiš zlo, sustegni se!"

Među njegovim blagodatima jeste oprost grijehа i iskup za prijestupe: "Ko isposti ramazan s vjerom u Allaha i nadom u Njegovu nagradu, bit će mu oprošteni raniji grijesi."

"Ko provede ramazanske noći u ibadetu, vjerujući u Allaha i nadajući se Njegovoj nagradi, bit će mu oprošteni raniji grijesi."

"Ko provede Noć kadra u ibadetu, vjerujući u Allaha i nadajući se Njegovoj nagradi, bit će mu oprošteni raniji grijesi."

"Ko klanja s imamom dok on ne završi, bit će mu upisana nagrada kao da je cijelu noć klanjao."

Ramazan je mjesec darova, spuštanja Allahove milosti, poklona i blagodati. Svaki musliman u ramazanu, u svakom danu i svakoj noći, ima dovu koja se prima. Zato, o Allahov robe, traži od Plemenitog i moli Milostivog; Njegove riznice ne presušuju.





Najnemoćniji i najslabiji je onaj koji nije u stanju uputiti dovu Gospodaru ljudi. Zbog toga je Poslanik, sallallahu alejhi ve sellem, obradovao svoje ashabe dolaskom ramazana. Ebu Hurejra, radijallahu anhu, prenosi da je rekao: "Došao vam je ramazan, blagoslovljeni mjesec. Allah vam je propisao post u njemu. U njemu se otvaraju vrata Dženneta, zatvaraju vrata Džehennema i okivaju šejtani. U njemu je noć bolja od hiljadu mjeseci; kome bude uskraćeno njeno dobro, zaista je uskraćen." (Ahmed)

Zato radite, vjernici! Dani su stranice naših života, a sretan je onaj ko ih ispuni najboljim djelima. Budite umjereni, trudite se i radujte se, i znajte da su Allahu najdraža djela ona koja se čine ustrajno, makar bila i mala.

Uzvišeni kaže: "U mjesecu ramazanu počelo je objavljivanje Kur'ana, koji je putokaz ljudima i jasan dokaz Pravoga puta i razlikovanja dobra od zla. Ko od vas u tom mjesecu bude kod kuće, neka ga u postu provede, a ko se razboli ili se na putu zadesi, neka isti broj dana naposti – Allah želi da vam olakša, a ne da poteškoće imate – da određeni broj dana ispunite, i da Allaha veličate zato što vam je ukazao na Pravi put, i da zahvalni budete." (El-Bekara, 185)

O vjernici, post je propisan radi pročišćenja duša, njihovog odgoja i postizanja bogobožnosti i njenih plodova. On podstiče na postizanje vrlina i udaljavanje od poroka. Post čuva čovjeka od razvrata i grijeha. U vjerodostojnim hadisima stoji da je Poslanik, sallallahu alejhi ve sellem, rekao: "Post je štit. Zato neka postač ne govori bestidne riječi i neka ne bude grub. Ako ga neko napadne ili uvrijedi, neka kaže: 'Ja postim, ja postim.'"

Čuvajmo svoju glavu (oči, uši, misli), i čuvajmo stomak i ono što u njega unosimo, kako bi se ostvario smisao posta. Ko ne ostavi lažan govor i postupanje po njemu, takav od posta ima samo glad i žeđ. Poslanik, sallallahu alejhi ve sellem, rekao je: "Ko ne ostavi lažan govor i postupanje po njemu i neznanje, Allahu nije potrebno da ostavlja hranu i piće." (Buhari)





Poštovani vjernici, mjesec posta je mjesec oslobađanja od Vatre. Uzvišeni Allah svakog dana i svake noći u ramazanu oslobađa ljude od Džehennema.

Zato, pokažimo Plemenitom od sebe ono najbolje, približavajući Mu se raznim vidovima pokornosti, obaveznim i dobrovoljnim djelima. Nesretan je onaj kome u ramazanu ne bude oprošteno. Poslanik, sallallahu alejhi ve sellem, rekao je: "Ponižen bio onaj ko dočeka ramazan, pa prođe, a ne bude mu oprošteno."

U ovom hadisu doslovno je rečeno "neka mu se nos prilijepi za zemlju", kao izraz poniženja i gubitka, utječemo se Allahu od toga.

Dočekajmo mjesec posta čišćenjem srca od mržnje, zavisti i neprijateljstva. Ramazan je vrijeme oprosta i pomirenja. Naš Gospodar je Onaj Koji mnogo prašta i voli oprost, i voli one koji opraštaju. Ko želi da Allah njemu oprost, neka oprašta ljudima. Ko se prema ljudima odnosi blago i s razumijevanjem, Allah će se prema njemu odnositi s oprostom i milošću.

Donosite salavate na Poslanika, sallallahu alejhi ve sellem, podarenu milost i nepresušnu blagodat, to vam je naredba od vašeg Gospodara, Koji je objavio: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljte mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

